

23 April 2024

SIARAN MEDIA

Untuk Hebahan Segera



IR MALAYSIA TAWAR IBADAH KORBAN DI ENAM NEGARA

Bangi – Islamic Relief Malaysia (IR Malaysia) melancarkan kempen Rezeki Qurban #zahirkankesyukuran dengan sasaran dana sebanyak RM500,000 sempena sambutan Aidiladha tahun ini.

Ketua Pegawai Eksekutifnya, Mohd Shukor Tahir berkata, IR Malaysia membuka penyertaan sebanyak 810 bahagian korban untuk diagihkan kepada golongan asnaf dan fakir miskin di Mali, Malawi, Somalia, Yaman, Syria dan Gaza, Palestin.

“Setiap tahun, IR Malaysia komited untuk menjadikan ibadah korban umat Islam, khususnya di Malaysia lebih bermakna.

“Tahun ini, bermula dengan penyertaan serendah RM380 satu bahagian, mereka berpeluang melaksanakan ibadah yang sangat dituntut ini disamping dapat membantu golongan memerlukan menerusi agihan sumbangan daging korban,” katanya.

Tambah Mohd Shukor, antara golongan penerima manfaat yang akan menerima sumbangan ini termasuklah ibu tunggal, warga emas, anak yatim, Orang Kurang Upaya (OKU), pelarian, keluarga terjejas bencana, dan keluarga dengan bilangan isi rumah ramai.

Setiap pek agihan daging korban mengandungi kira-kira 2 hingga 4 kilogram daging yang dijangka dapat memberi keringanan kepada keluarga penerima bagi tempoh satu minggu.

“Pada tahun lepas, berkat sokongan orang ramai, Islamic Relief secara global telah berjaya mengagihkan 607,402 pek daging korban untuk dinikmati oleh lebih 3.4 juta orang di 28 buah negara.

“Agihan tersebut merangkumi penyertaan bahagian korban daripada rakyat Malaysia yang memberi manfaat kepada 18,802 penduduk di Mali, Malawi, Somalia, Yaman, Syria dan Gaza, Palestin melalui edaran 1,168 pek daging korban.

“Asas pemilihan negara-negara bagi pelaksanaan korban yang ditawarkan Islamic Relief antaranya meliputi aspek ekonomi sesebuah negara, di mana penduduknya hidup di bawah paras kemiskinan, negara yang berdepan krisis dan konflik kemanusiaan berpanjangan serta penduduk di negara yang berdepan masalah kekurangan zat makanan atau malnutrisi,” kongsi Mohd Shukor.

Orang ramai diseru untuk mendaftar bahagian korban bersama IR Malaysia dengan memilih mana-mana pakej sumbangan berikut; RM380 (Mali), RM480 (Malawi), RM520 (Somalia), RM1,200 (Yaman), RM2,200 (Syria) dan RM2,200 (Gaza, Palestin).

Untuk mendapat maklumat lanjut, layari laman sesawang www.islamic-relief.org.my atau hubungi talian 03-8926 3434 atau terus hadir ke pejabat IR Malaysia. Pendaftaran Rezeki Qurban dibuka sehingga 10 Jun 2024.

- TAMAT -

Mengenai Islamic Relief

Islamic Relief (IR) merupakan sebuah organisasi bantuan dan pembangunan kemanusiaan antarabangsa yang ditubuhkan pada tahun 1984 dan beribu pejabat di Birmingham, United Kingdom. IR berkhidmat di lebih 45 buah negara dan telah membantu lebih daripada 120 juta orang sejak beroperasi. Skop bantuan Islamic Relief merangkumi bantuan kecemasan, pembangunan mampan bersepadu, pengurangan risiko bencana dan advokasi.

Mengenai Islamic Relief Malaysia

Islamic Relief Malaysia (IR Malaysia) telah ditubuhkan pada tahun 2005, bertujuan untuk meneruskan bantuan kemanusiaan Islamic Relief di rantau Asia-Pasifik. Kini, IR Malaysia berperanan sebagai pejabat penjana dana dan pelaksana projek tempatan dan antarabangsa.

Maklumat lanjut mengenai IR Malaysia boleh diperoleh di www.islamic-relief.org.my.

Dikeluarkan oleh: Unit Komunikasi Strategik, Pejabat KPE Islamic Relief Malaysia. Untuk keterangan lanjut, hubungi Zafirah Zahari di talian 019-220 1788 atau e-mel ke Zafirah.Zahari@islamic-relief.org.my